

Na osnovu člana 24. stav 8. Zakona o veterinarstvu u Bosni i Hercegovini ("Službeni glasnik BiH", broj 34/02) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na prijedlog Ureda za veterinarstvo Bosne i Hercegovine, na 141. sjednici održanoj 12. januara 2011. godine, donijelo je

**PRAVILNIK
O VETERINARSKIM USLOVIMA ZA UVOZ ODREĐENIH VRSTA PTICA I O
USLOVIMA KARANTINA**

Član 1.

(Predmet)

Ovim se Pravilnikom propisuju veterinarski uslovi za uvoz određenih vrsta ptica iz zemalja ili dijela zemlje koji se navode u Dodatku I ovog Pravilnika, te uslovi karantina za navedeni uvoz ptica.

Član 2.

(Djelokrug primjene)

Ovaj Pravilnik se primjenjuje na životinje iz porodice ptica, isključujući:

- a) kokoši, čurke, biserke, patke, guske, prepelice, golubove, fazane, jarebice i bezgreberike uzgojene ili držane u zatočeništvu za rasplod, proizvodnju mesa ili konzumnih jaja, ili za popunjavanje lovišta (pernata divljač);
- b) ptice uvezene u okviru programa zaštite odobrenog u Bosni i Hercegovini;
- c) kućne ljubimce u pratnji vlasnika;
- d) ptice namijenjene zoološkim vrtovima ili ogledima;
- e) ptice namijenjene odobrenim organima, institucijama ili centrima;
- f) golubove za takmičenje uvezene u Bosnu i Hercegovinu iz susjedne zemlje gdje je njihovo boravište, koji su odmah pušteni s očekivanjem da će odletjeti natrag u odnosnu zemlju.

Član 3.

(Pojmovi)

Za potrebe ovog Pravilnika koriste se slijedeći pojmovi:

- a) *ptice su životinje*, izuzev onih navedenih u članu 2. ovog Pravilnika;
- b) *objekt odobren za uzgoj ptica je*:
 - 1) objekt koji se koristi isključivo za uzgoj ptica i;
 - 2) koji je pregledan i odobren od nadležnog organa zemlje izvoznice, te udovoljava uslovima iz člana 4. ovog Pravilnika i Dodatka II;
- c) *ptice uzgojene u zatočeništvu* su ptice koje nisu ulovljene u divljini, već su rođene i uzgojene u zatočeništvu i potiču od roditelja koji su se parili ili su oplođena jaja na drugi način prenesena u zatočeništvo;
- d) *bešavni nožni prsten* je prsten ili obruč kružnog oblika, bez prekida ili spoja, s kojim nije manipulirano na bilo koji način, takve veličine da se ne može skinuti s noge ptice kada je u potpunosti razvijena nakon što je stavljen u prvim danima njenog života, komercijalno proizveden isključivo u tu svrhu;
- e) *odobreni karantinski objekt* je objekt koji nije karantinski centar, a koji:
 - 1) služi kao karantin za uvezene ptice;
 - 2) je pregledan i odobren od nadležnog veterinarskog inspektora i udovoljava minimalnim uslovima iz člana 6. ovog Pravilnika i Dodatka IV;
- f) *odobreni karantinski centar* je prostor:
 - 1) koji služi kao karantin za uvezene ptice;
 - 2) koji sadrži određeni broj jedinica, koje su operativno i fizički odvojene jedna od druge i svaka pojedina jedinica sadrži samo ptice iz iste pošiljke, istog zdravstvenog statusa i tvori jednu epidemiološku jedinicu; 3) koji je pregledan i odobren od strane nadležnog veterinarskog inspektora, te udovoljava minimalnim uslovima iz člana 6. ovog Pravilnika i Dodatka IV;
- g) *sentinel ptice* su perad koja će se koristiti kao dijagnostička pomoć za vrijeme karantina;
- h) *dijagnostički priručnik* je Dijagnostički priručnik za influencu ptica ("Službeni glasnik BiH", broj 74/10);
- i) *nadležni organi* za provođenje ovog Pravilnika su:
 - 1) Ministarstvo vanjske trgovine i ekonomskih odnosa Bosne i Hercegovine - Ured za veterinarstvo Bosne i Hercegovine (u daljnjem tekstu: Ured);

"Službeni glasnik BiH", broj: 17/11

- 2) Nadležni organi entiteta i Brčko Distrikta Bosne i Hercegovine (u daljnjem tekstu: Brčko Distrikt BiH) su: nadležni organi definirani Zakonom o veterinarstvu u Federaciji Bosne i Hercegovine ("Službene novine FBiH", broj 46/00), Zakonom o veterinarstvu u Republici Srpskoj ("Službeni glasnik RS", broj 42/08) i Zakonom o veterinarstvu u Bosni i Hercegovini ("Službeni glasnik BiH", broj 34/02) u slučaju Brčko Distrikta BiH;
 - 3) Nadležni veterinarski inspekcijski organi entiteta su: nadležni organi definirani Zakonom o inspekcijama u Federaciji Bosne i Hercegovine ("Službene novine FBiH", broj 69/05) i Zakonom o inspekcijama u Republici Srpskoj ("Službeni glasnik RS", broj 74/10);
- j) *nadležni veterinarski inspektor* je inspektor nadležan za određeno administrativno područje;
- k) *kucni ljubimci* su životinje vrsta: psi, mačke, pitome vretice, beskičmenjaci (osim pčela i rakova), ukrasne tropske ribe, vodozemci, gmizavci, ptice (sve vrste osim peradi), sisari (glodari i domaći kunići) koje su u pratnji njihovih vlasnika ili fizičko lice koje je odgovorno za takve životinje u ime vlasnika tokom njihovog kretanja i koje nisu namijenjene prodaji ili prijelazu u vlasništvo drugog vlasnika;
- l) *odobreni organi, institucije ili centri* su stalni, geografski ograničeni objekti odobreni od strane nadležnih organa, gdje se jedna ili više vrsta životinja uobičajeno čuva ili uzgaja, bilo sa komercijalnim ili drugim završetkom, a isključivo su namijenjeni za jednu ili više slijedećih svrha:
- 1) prikazivanje životinja i obrazovanje javnosti;
 - 2) očuvanje vrste;
 - 3) osnovna ili primijenjena izučavanja ili uzgoj životinja u svrhu takvog izučavanja.

Član 4.

(Odobreni objekti za uzgoj ptica)

Odobreni objekti za uzgoj ptica moraju udovoljavati slijedećim uslovima:

- a) objekt za uzgoj ptica mora biti odobren od nadležnog organa zemlje izvoznice u skladu s uslovima navedenim u Dodatku II ovog Pravilnika te mu mora biti dodijeljen odobreni broj;
- b) naziv i odobreni broj objekta za uzgoj ptica mora se nalaziti na listi objekata za uzgoj koju je izradila Evropska komisija.

Član 5.

(Uslovi uvoza ptica)

Uvoz ptica bit će odobren ako ptice udovoljavaju slijedećim uslovima:

- a) ptice moraju biti uzgojene u zatočeništvu;
- b) ptice moraju:
 - 1) poticati iz zemalja ili dijelova tih zemalja navedenih u Dodatku I ovog Pravilnika;
 - 2) dolaziti iz odobrenih objekata za uzgoj ptica koji udovoljavaju uslovima iz člana 4. ovog Pravilnika;
- c) ptice moraju biti podvrgnute laboratorijskom testiranju u periodu od 7 do 14 dana prije otpreme s negativnim rezultatom na bilo koji virus influence ptica i virus njukastl bolesti (eng. newcastle disease), (u daljnjem tekstu: njukastl bolest);
- d) ptice ne smiju biti cijepljene protiv influence ptica;
- e) ptice mora pratiti certifikat o zdravlju životinja u skladu s modelom certifikata iz Dodatka III ovog Pravilnika;
- f) ptice moraju biti označene individualnim identifikacijskim brojem na nožnom prstenu ili mikročipom;
- g) individualni identifikacijski broj nožnog prstena ptice ili mikročip iz tačke f) ovog člana mora sadržavati najmanje slijedeće podatke:
 - 1) međunarodni kod zemlje izvoznice (ISO) koja je provela označavanje,
 - 2) jedinstveni serijski broj;
- h) individualni identifikacijski broj iz tačke f) ovog člana mora biti upisan u certifikat o zdravlju životinja;
- i) ptice moraju biti prevožene u novim kavezima koji su izvana pojedinačno označeni identifikacijskim brojem navedenim u veterinarskom certifikatu.

Član 6.

(Odobreni karantinski objekti i centri)

- (1) Nadležni organi entiteta i Brčko Distrikta BiH izrađuju i ažuriraju popis karantinskih objekata i centara koji udovoljavaju minimalnim uslovima iz Dodatka IV ovog Pravilnika.
- (2) Nadležni organi entiteta i Brčko Distrikta BiH dostavljaju popis karantinskih objekata i centara iz stava (1) ovog člana, Uredu koji vodi jedinstveni popis objekata.

Član 7.

(Prijevoz ptica od graničnog veterinarskog prijelaza u
odobrene karantinske objekte ili centre)

- (1) Ptice moraju biti prevožene u kafezima ili krletkama direktno s graničnog veterinarskog prijelaza u odobreni karantinski objekt ili centar.
- (2) Ukupan vremenski period putovanja od graničnog veterinarskog prijelaza do odobrenog karantinskog objekta ili centra ne smije biti duži od devet sati.
- (3) Vozila koja se koriste za prijevoz ptica moraju biti zapečaćena od graničnog veterinarskog inspektora službenim pečatom.

Član 8.

(Potvrda)

- (1) Uvoznici ili njihovi zastupnici dužni su osigurati potvrdu, izdatu na jednom od službenih jezika u upotrebi u Bosni i Hercegovini, a potpisanu od lica odgovornog za karantinski objekt ili centar, kojom se potvrđuje da će ptice biti prihvaćene u karantinu.
- (2) Potvrda iz stava (1) ovog člana mora:
 - a) sadržavati čitko napisan naziv i adresu te odobreni broj karantinskog objekta ili centra;
 - b) biti poslana elektronskom poštom ili faksom na granični veterinarski prijelaz prije dopreme pošiljke na navedeni prijelaz ili je može dostaviti lično uvoznik ili njegov zastupnik prije puštanja pošiljke s graničnog veterinarskog prijelaza.

Član 9.

(Praćenje prijevoza ptica)

- (1) U slučaju kada propisi zahtijevaju provođenje praćenja ptica od graničnog veterinarskog prijelaza do odobrenog karantinskog objekta ili centra u mjestu odredišta, mora se omogućiti razmjena podataka i to:
 - a) granični veterinarski inspektor mora obavijestiti nadležnog veterinarskog inspektora odgovornog za odobreni karantinski objekt ili centar u mjestu odredišta pošiljke o mjestu porijekla i mjestu odredišta ptica elektronskom poštom ili faksom;
 - b) lice odgovorno za odobreni karantinski objekt ili centar mora elektronskom poštom ili faksom, tokom jednog radnog dana od datuma prispjeća pošiljke u karantinski objekt ili centar, obavijestiti nadležnog veterinarskog inspektora odgovornog za odobreni karantinski objekt ili centar u mjestu odredišta pošiljke o prispjeću pošiljke;
 - c) nadležni veterinarski inspektor odgovoran za odobreni karantinski objekt ili centar u mjestu odredišta pošiljke mora obavijestiti elektronskom poštom ili faksom, u periodu od tri radna dana od datuma prispjeća pošiljke u karantinski objekt ili centar, graničnog veterinarskog inspektora koji je ga je obavijestio o prispjeću pošiljke u mjesto odredišta.
- (2) Ako granični veterinarski inspektor dobije obavijest da ptice, namijenjene za odobreni karantinski objekt ili centar, nisu pristigle u mjesto odredišta odobrenog karantinskog objekta ili centra u periodu od tri radna dana od predviđenog datuma dolaska pošiljke, nadležni veterinarski inspektor mora preduzeti odgovarajuće mjere prema licu odgovornom za pošiljku.

Član 10.

(Karantin)

- (1) Ptice moraju provesti najmanje 30 dana u odobrenom karantinskom objektu ili centru (u daljnjem tekstu: karantin).
- (2) Na početku i na kraju karantina svake pošiljke ptica, nadležni veterinarski inspektor mora provesti nadzor nad uslovima karantina svake pošiljke uključujući evidenciju o mortalitetu i kliničkom pregledu ptica u odobrenom karantinu ili u pojedinoj jedinici odobrenog karantina.
- (3) Nadležni veterinarski inspektor može i češće provoditi nadzor, ukoliko to nalaže epizootiološka situacija.

Član 11.

(Pregled, uzorkovanje i testiranje pošiljke za vrijeme karantina)

- (1) Po prispjeću ptica u karantin moraju biti provedeni pregledi, uzorkovanja i testiranja na influencu ptica i njukastl bolest, kako je određeno u Dodatku V ovog Pravilnika.
- (2) U slučaju korištenja sentinel ptica, mora se upotrijebiti najmanje deset sentinel ptica u odobrenom karantinu ili svakoj jedinici odobrenog karantina.
- (3) Sentinel ptice koje se koriste za preglede, uzorkovanja i testiranja moraju biti:
 - a) stare najmanje tri sedmice i korištene samo jednom za ovu svrhu;
 - b) označene nožnim prstenom ili nekom drugom identifikacijskom oznakom koja se ne može ukloniti;

"Službeni glasnik BiH", broj: 17/11

- c) necijepljene i seronegativne na influencu ptica i njukastl bolest u periodu od 14 dana prije dana početka karantina;
- d) smještene u odobreni karantinski objekt ili jedinicu odobrenog karantinskog centra prije dolaska ptica u zajednički zračni prostor i što je moguće bliže pticama kako bi se osigurao bliski kontakt između sentinel ptica i izlučevina (ekskremenata) ptica u karantinu.

Član 12.

(Mjere u slučaju sumnje na bolest u odobrenom karantinu)

- (1) U slučaju sumnje na pojavu influence ptica ili njukastl bolesti kod jedne ili više ptica i/ili sentinel ptica za vrijeme trajanja karantine u odobrenom karantinu, moraju se preduzeti slijedeće mjere:
 - a) nadležni veterinarski inspektor stavlja pod službeni nadzor odobreni karantin;
 - b) moraju se uzeti i analizirati uzorci ptica i sentinel ptica za virusološke pretrage u skladu s tačkom 2) iz Dodatka V ovog Pravilnika;
 - c) zabranjen je ulazak i izlazak ptica iz odobrenog karantina dok se ne isključi sumnja na bolest.
- (2) U slučaju potvrđene sumnje na influencu ptica ili njukastl bolest u odobrenom karantinu, moraju se preduzeti slijedeće mjere:
 - a) sve ptice i sentinel ptice u odobrenom karantinu moraju se usmrtiti i neškodljivo ukloniti;
 - b) odobreni karantin mora se očistiti i dezinficirati;
 - c) zabraniti ulazak ptica u odobreni karantin do isteka 21 dan od čišćenja i završne dezinfekcije.
- (3) U slučaju sumnje na pojavu influence ptica ili njukastl bolest kod jedne ili više ptica i/ili sentinel ptica za vrijeme trajanja karantina u jedinici karantina, moraju se preduzeti slijedeće mjere:
 - a) nadležni veterinarski inspektor stavlja pod službeni nadzor odobreni karantin;
 - b) moraju se uzeti i analizirati uzorci ptica i sentinel ptica za virusološke pretrage u skladu s stavom (2) iz Dodatka V ovog Pravilnika;
 - c) zabraniti ulazak i izlazak ptica iz odobrenog karantina dok se ne isključi sumnja.
- (4) U slučaju potvrđene sumnje na influencu ptica ili njukastl bolest u odobrenom karantinu iz stava (3) ovog člana, moraju se preduzeti slijedeće mjere:
 - a) sve ptice i sentinel ptice u odobrenom karantinu moraju se usmrtiti i neškodljivo ukloniti;
 - b) zahvaćena jedinica mora se očistiti i dezinficirati;
 - c) moraju se uzeti slijedeći uzorci:
 - 1) ukoliko se koriste sentinel ptice, uzorci od sentinel ptica u drugim karantinima za serološka ispitivanja iz Dodatka V ovog Pravilnika ne ranije od 21 dan nakon provedenog čišćenja i završne dezinfekcije zahvaćene jedinice ili;
 - 2) ukoliko se ne koriste sentinel ptice, uzorci od ptica iz drugih karantina za virusološka ispitivanja iz u skladu sa tačkom 2) iz Dodatka V ovog Pravilnika, tokom 7 do 15 dana nakon provedenog čišćenja i završne dezinfekcije;
 - d) niti jedna ptica ne smije napustiti odobreni karantin do dobijanja negativnih rezultata uzorkovanja iz tačke (c) ovog stava.
- (5) Nadležni veterinarski inspektor o preduzetim mjerama iz ovog člana obavještava nadležne organe entiteta i Brčko Distrikta BiH, a ovi organi obavještavaju Ured.

Član 13.

(Odstupanja u slučaju pojave niskopatogene influence ptica ili njukastl bolesti u odobrenom karantinskom objektu ili centru)

- (1) Ukoliko se za vrijeme karantina utvrdi infekcija kod jedne ili više ptica i/ili sentinel ptica virusom niskopatogene influence ptica (u daljnjem tekstu: NPIP) ili njukastl bolesti, Ured uz saglasnost nadležnih organa entiteta i Brčko Distrikta BiH može, na osnovu procjene rizika odobriti odstupanje od mjera iz člana 12. stav (2) tačka (a) i člana 12. stav (4) tačka (a) ovog Pravilnika, pod uslovom da to odstupanje ne ugrožava kontrolu navedenih bolesti.
- (2) U slučaju dozvoljenih odstupanja Ured mora odmah obavijestiti Svjetsku organizaciju za zdravlje životinja (u daljnjem tekstu: OIE), Evropsku komisiju i nadležne organe svih susjednih zemalja u skladu s članom 12. Odluke o zaraznim bolestima ("Službeni glasnik BiH", broj 44/03).
- (3) Nadležni veterinarski inspektor prilikom pregleda odobrenog karantina u kojem je odobreno odstupanje, a u kojem je jedna ili više ptica i/ili sentinel ptica inficirana s NPIP ili njukastl bolesti, postupa u skladu sa st. (4) do (9) ovog člana, a nadležni veterinarski inspektor o navedenim mjerama odmah obavještava nadležne organe entiteta i Brčko Distrikta BiH, a ovi organi obavještavaju Ured.
- (4) U slučaju pozitivnog nalaza NPIP, umjesto standardnih uzoraka koji su propisani u Dijagnostičkom priručniku, u periodu od 21 dan od posljednjeg pozitivnog nalaza NPIP u odobrenom karantinskom objektu, ili iz svake jedinice odobrenog karantinskog centra u intervalima od 21 dan, za laboratorijsko testiranje moraju se uzeti slijedeći uzorci:

"Službeni glasnik BiH", broj: 17/11

- a) uzorci bilo kojih uginulih sentinel ptica ili drugih ptica prisutnih za vrijeme uzorkovanja;
- b) brisovi dušnika/ždrijela i kloake od najmanje 60 ptica ili brisovi svih ptica ako ih u odobrenom karantinskom objektu ili zahvaćenoj jedinici odobrenog karantinskog centra ima manje od 60, ili uzorci svježeg izmeta kod malih ptica, egzotičnih ili kojimase teško rukuje ili bi rukovanje njima predstavljalo opasnost za ljude. Uzorkovanje i laboratorijsko testiranje navedenih uzoraka mora se nastaviti sve dok se u dva uzastopna testiranja provedena u intervalu od najmanje 21 dan ne dobiju negativni rezultati.
- (5) Na osnovu rezultata procjene rizika Ured, uz saglasnost nadležnih organa entiteta i Brčko Distrikta BiH, može odobriti odstupanje od veličine uzorka iz stava (4) ovog člana.
- (6) U slučaju pozitivnog nalaza na njukastl bolest, Ured uz saglasnost nadležnih organa entiteta i Brčko Distrikta BiH, može jedino dozvoliti odstupanje pod uslovom da su, 30 dana nakon posljednjeg uginuća ili kliničkog ozdravljenja posljednje oboljele životinje, uzorkovanjem iz tač. 1. i 2. Dodataka V ovog Pravilnika dobijeni negativni rezultati.
- (7) Ptice ne smiju biti puštene iz karantina sve do isteka perioda za laboratorijsko testiranje navedeno u stavu (3) ovog člana.
- (8) Odobreni karantinski objekt ili jedinica odobrenog karantina mora se očistiti i dezinficirati nakon pražnjenja. Svi predmeti ili otpad koji mogu biti kontaminirani moraju se ukloniti i uništiti na način da se spriječi širenje uzročnika i zajamči uništenje virusa NPIP ili njukastl bolesti, kao i svog otpada nakupljenog tokom laboratorijskog testiranja iz stava (4) ovog člana.
- (9) Nove životinje mogu se uvoditi u odobreni karantin i tek 21 dan nakon obavljenog čišćenja i završne dezinfekcije iz stava (8) ovog člana.

Član 14.

(Mjere u slučaju sumnje na klamidiozu)

Ukoliko se za vrijeme trajanja karantina u odobrenom karantinskom objektu ili centru posumnja ili potvrdi infekcija papiga na klamidiozu (*Chlamydothyla psittaci*), sve ptice iz pošiljke moraju biti tretirane na propisani način, te se period trajanja karantina produžava za najmanje dva mjeseca od datuma zadnjeg zabilježenog slučaja ove infekcije.

Član 15.

(Raspuštanje karantina)

Karantin s pticama raspušta se iz odobrenog karantina uz odobrenje nadležnog veterinarskog inspektora u pisanom obliku.

Član 16.

(Obaveze prijave i izvještavanja)

O slučaju pojave influence ptica ili njukastl bolesti u odobrenom karantinu nadležni veterinarski inspektor mora što je bržemoguće, anajkasnije u periodu od 24 sata o tome obavijestiti nadležni organ entiteta i Brčko Distrikta BiH, a ovi organi obavještavaju Ured.

Član 17.

(Troškovi karantina)

Sve troškove karantina, definirane ovim Pravilnikom, snosi uvoznik ptica.

Član 18.

(Uvoz iz ostalih zemalja)

Za uvoz pošiljki životinja iz člana 2. ovog Pravilnika iz zemalja članica Evropske unije, Andore, Lihtenštajna, Monaka, Norveške, San Marina, Švicarske i Vatikana primjenjuje se model sertifikata iz Dodatka III.

Član 19.

(Dodaci)

Dodaci I do V u prilogu ovog Pravilnika su njegov sastavni dio.

Član 20.

(Stupanje na snagu)

Ovaj Pravilnik stupa na snagu danom donošenja i objavljuje se u "Službenom glasniku BiH", a primjenjivat će se od 01.07.2011. godine, osim člana 6. ovog Pravilnika koji će se primjenjivati od 01.01.2012. godine.

VM broj 16/11 Predsjedavajući Vijeća ministara BiH Dr. **Nikola Špirić**, s.r.
12. januara 2011. godine Sarajevo